

LE CHAPITRE DE L'ESPREEVE,
*contenant dix-huict versets, escrit
à la Meque.*

Quelques Docteurs Mahometans ont intitulé ce Chapitre de la vocation, parce qu'il traite des femmes qui ont quitté leurs marys pour suivre la loy de Mahomet, qui ordonne d'esprouver leur cœur, leur intention, & de cognoistre leur vocation.

AV nom de Dieu clement & misericordieux. O vous qui croyez, n'obeissez pas à mes ennemis ny aux vostres, vous leur tesmoignez de l'amitié lors que vous les rencontrez, neant moins ils abjurent la verité qui vous a esté enuoyée, ils chassent le Prophete & vous aussi ; & ce parce que vous croyez en Dieu vostre Seigneur. Ne recherchez pas leur amitié lors que vous combattrez pour ma loy, ie sçay ce que vous deuez craindre, & vous ne le sçavez pas, celuy qui fera ce qui est deffendu cy-dessus suiura vn tres-mauuais chemin, s'ils ont aduantage sur vous ils seront vos ennemis, ils estendront leurs mains & leurs langues contre vous, ils vous dirôt des iniures, & souhaiteront que vous reniez vostre foy, si vous le faites vous ne receurez point de contentement de

vos femmes ny de vos enfans au iour du Iugement, vous ferez separé d'eux, & Dieu verra tout ce que vous ferez, vous auez vn bel exemple en Abraham & en ceux qui estoient avec luy, lors qu'ils ont dit au peuple, nous sommes innocens du peché que vous faites d'adorer vn autre Dieu que Dieu; Abraham disoit à son pere, ie ne demanderay pas pardon à Dieu pour toy, ie ne te puis deliurer de sa punition si tu es Idolatre, Seigneur, toute nostre confiance est en toy, nostre refuge est en ta misericorde ne protege pas les infidelles contre nous, pardonne nous nos pechez, tu est misericordieux & sage. Vous auez en eux vn bel exemple pour ceux qui craignent Dieu & qui apprehendent le iour du Iugement; Dieu n'a pas affaire de ceux qui obeissent aux infidelles, il n'a besoin de personne, & louange luy est deuë en tous lieux, peut-estre qu'il establira à l'aduenir vne grande amitié entre vous & ceux que vous haïssiez, il est tout-Puissant, clement & misericordieux, il ne vous deffend pas la conuersation de ceux qui ne combattent pas contre vous pour sa foy, & qui ne vous chassent pas de vos maisons, il ne vous deffend pas de leur rendre iustice, il ayme les personnes iustes. Il vous deffend la conuersation de ceux qui combattent contre vostre foy, qui vous chassent de vos maisons, & qui aydent à vous enchasser, il vous deffend de leur obeyr & de contracter amitié avec eux, ceux qui leur obeiront auront tres-grand tort. O vous qui croyez en Dieu, lors que les femmes de

vos ennemis se ietteront de vostre party, esprouuez leur conscience; si vous cognoissez qu'elles soient fideselles, & qu'elles croyent en la loy de Dieu, ne les rendez pas aux infidelles incredules, il ne leur est pas permis de les cognoistre, ny a elles de les toucher, donnez leur pour subsister, vous ne pecherés pas de les espouser, ne les espousés pas selon les statuts des infidelles, demandés leur quelle dote elles veulent auoir, elles vous demanderont ce que vous leur voulés donner, demeurez-en d'accord, Dieu le commande de la façon, il fera vostre Iuge au iour du Iugement, il sçait tout ce que vous faites & est tres-sage. Si vos femmes se iettent du party des infidelles, & que vous en souffriés quelque perte, vous remplacerez cette perte à celuy qui la souffrira sur le butin que vous conquerrés, craignés Dieu & croyés en la loy de sa diuine Majesté. O Prophete, lors que les femmes voudront embrasser la Religion avec ferme propos de croire en seul Dieu, de ne pas desrober, de ne pas paillarder, de ne pas tuer leurs enfans, de ne mentir ny blasphemer, & d'estre obeissantes, reçois-les avec toy, demande pardon à Dieu pour elles, il est clement & misericordieux. O vous qui croyés, n'obeissés pas à ceux contre qui Dieu est courroucé, ils desesperent de leur salut comme en ont desesperé les impies qui sont cy-deuant morts en leur impieté.